

GLC, GLIC perlu beri lebih sumbangan untuk bantu Negara
Astro Awani
01 November 2020
Hasimi Muhamad

PUTRAJAYA: Syarikat Berkaitan Kerajaan (GLC) dan Syarikat Pelaburan Berkaitan Kerajaan (GLIC) perlu memberikan sumbangan lebih besar dan membantu negara bagi mengharungi cabaran ekonomi semasa.

Menteri Kewangan, Tengku Datuk Seri Zafrul Tengku Abdul Aziz berkata, beliau tidak menafikan sumbangan besar syarikat berkenaan namun mengakui kerajaan memerlukan sokongan lebih besar.

“Kerajaan memerlukan sokongan daripada sektor swasta serta GLC dan GLIC. Saya rasa pemimpin GLC dan GLIC kena buat perubahan minda pada ketika ini kerana berlaku tekanan kepada ekonomi dan rakyat berada dalam kesusahan.

“Kerajaan akan lakukan apa yang boleh tetapi GLC dan GLIC juga perlu bantu untuk menghidupkan semula ekonomi, mewujudkan peluang pekerjaan dan sebagainya. Saya yakin usaha ini akan banyak membantu negara,” katanya seperti dilaporkan Sinar Harian.

Menurut Tengku Zafrul, beliau kini sudah memulakan rundingan dengan GLC dan GLIC baru-baru ini.

“Saya sudah mula berunding dengan GLC dan GLIC beberapa minggu lepas dan sekarang adalah masa untuk mereka memimpin dan menunjukkan bahawa Indeks Prestasi Utama (KPI) GLC dan GLIC bukan sahaja untuk mencatatkan keuntungan semata-mata.

“Buat masa ini kita masih dalam peringkat perbincangan untuk mengetahui bagaimana mereka boleh membantu ekonomi dan rakyat kita. Saya rasa ini penting tetapi ia masih dalam perbincangan,” ujar beliau.

Sementara itu, beliau menegaskan enggan melihat GLC dan GLIC memperlahankan pelaburan apabila melihat keadaan ekonomi semasa yang tidak menentu.

“Ini tidak boleh berlaku kerana kerajaan sendiri meningkatkan perbelanjaan pembangunan kerana kita mahu kesannya kepada ekonomi.

“GLC perlu membelanjakan lebih banyak perbelanjaan modal atau melabur dalam projek-projek pembinaan misalnya.

“Ia akan memberikan kesan limpahan ekonomi yang tinggi dan besar. Jangan tangguhkan, saya mahu pastikan mereka mewujudkan peluang pekerjaan dan ekonomi,” katanya.

Sementara itu, ketika diminta mengulas gaji ketua pegawai eksekutif GLC dan GLIC yang terlalu tinggi, ini jawapan beliau:

“Kerajaan tidak akan campur tangan mengenai perkara itu tetapi hanya akan memberikan saranan kepada mereka. Untuk berlaku adil, saya perlu menyatakan ada GLC yang sudah melakukan pemotongan gaji.

“Saya juga tahu ada sesetengah syarikat lain pun buat tetapi mereka tidak buat pengumuman rasmi kerana takut orang tahu mengenai gaji.

“Sektor minyak dan gas juga kena (potong gaji). Saya berharap dari segi pentadbiran, lembaga pengarah yang membuat keputusan, kerajaan tidak boleh kacau. Lembaga pengarah perlu bertindak dengan sewajarnya,” katanya.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/glc-glic-perlu-beri-lebih-sumbangan-untuk-bantu-negara-266297>